

本草綱目拾遺

本草綱目拾遺器用部目錄

番打馬

老材香

縛木藤

敗琉璃

浮子

油胭脂

木套皮

火漆

七氣罌口

紅羯白羯

疊布

舊帽沿

綿珠

紅絨

棉紗

舊頭繩

北雁砂

烏金紙

皮金紙

舊繖紙

包烟紙

粗草紙

廁草紙

酒罈上紙

燒酒草

古瓦

青龍背

絹篩籬

陳年竹燈盞

銅燈盞青

料絲

烏龍翅

船蓬簑

洋船璞

檣種

漆盤上漆

油木梳

衣帶

刀鞘

舊竹筴

草鞋鼻上布

織機上草辮

肉臺上屑

盛米栲栳

爛籬底

砂壺

靈鶴盞

花簪

小兒破鞋

夏布舊蚊帳

廁上椽木

尿板

白秋霜

本草綱目拾遺禽部目錄

燕窩 素燕窩

石燕

蝙蝠腦

石鋪

鷓鴣涎 蛋

翠鳥舌

白鷓鴣

鬱雞

豁雞

雪雞

洋鴨

烏鴉膽

鷲毛 屎 腿骨

涎 喉管 蛋殼

鷹吐毛 鷹條

雄雞卵



本草綱目拾遺獸部目錄

獅子油

血糞

象糞

象尾毛

犴血

醉虎

油膽脂

鹿胎

乳餅脛骨

猴經

犬豕胎糞

獬油

海狗油

狐麝

獺糞

狼脂

山羊血

油糞

石羊膽

山狸

犀皮

貂尾

七葛

香鼠

鼠血

猫尿

胎髮尾血白松香

浙驢皮膠

霞天膏

羊哀

蘭薰

家鄉肉蜆骨

雄猪眼梢肉

猪頂上精製火腿法



本草綱目拾遺卷九

錢塘趙學敏恕軒氏輯

器用部

番打馬

形長尺許內藏油膏外裹椶皮可代火把又可鞭馬番舶上來哈喇叭出○方輿勝覽做打麻乃樹脂結成夜點有光塗舟水不能入華夷考曰做打麻乃樹脂流落膠汁土內掘出如松香瀝青狀內有明淨好者都似金珀一般出滿刺加國性專殺蟲不可服有毒入外科瘡瘍膏用



治陰癬救生苦海用番打馬和鉛水銀雄硫樟腦  
各等分猪油和搽效○癩疥膿瘡積善堂良方麻  
黃膏中用之○疥瘡救生苦海番打馬三錢楓子  
肉五錢水銀杏仁蛇牀子各一錢川椒樟腦雄黃  
各二錢用紅燭蓋油共研勻擦之神效○治疥瘡  
應驗良方用全蝎乳香枯礬大楓子蛇牀子土木  
鼈川椒雄黃水銀番打馬輕粉樟腦爲末用燭油  
爲丸擦之卽效此方番打馬作番答木

擦諸瘡并楊梅風毒經驗 濟世良方黃柏去皮  
一錢黃連去蘆一錢川大黃五分三味另研雄黃

膽礬銅青兒茶青黛輕粉枯礬各二分冰片一分  
半另研入大楓子七個去殼去油人言壯人七釐  
弱者五釐用番打馬卽番舶打火把之物另爲末  
瘡毒盛而人壯健能食者每分五分毒盛而人弱  
者每分用三分不健不弱之人每分用四分和入  
前藥內研勻水銀壯健人每分用一兩中等人用  
五錢弱極人用三錢不可多藥須研極細否則粒  
粗恐傷皮肉右先將水銀一分并前藥末一分入  
盞內加眞芝麻油少許以指研開逐漸添油研至  
不見水銀爲度大約如稀糊可矣於兩手兩足掌

後動脈處週圍擦之每一分藥擦三日每日早晚各擦一次每次以七八百擦爲止大率擦使熱透則住擦時凡週身破傷處俱用無麝香膏藥貼之每日一換不可經風避帳幔內冬月用煖床厚被褥卽春夏秋暖時亦不可見風擦至七日必口吐臭涎若口齒破爛出血者用黃蜂窩煎湯候冷漱解勿嚥下輕則用花椒湯漱之擦處多皮破不可畏痛而少擦忌魚腥生冷發風等物及醋茶醬一個月尤忌房事其牛肉燒酒團魚之類忌二三年若蕎麥麵與羊肉則終身忌之每次擦畢以藍布

尺許包裹所擦處此治楊梅風毒法也如楊梅瘡初發者擦五六日全愈所用藥皆同惟水銀止用四五錢足矣不必貼膏藥○久遠瘰癧應擦處如有破爛可於脚手心擦之其藥料照中等者亦包布貼膏如前○下疳及蛀幹重者亦照中等藥擦治貼膏○喉內瘡癬潰爛不能進飲食者亦照前用中等藥擦○遍身牛皮風癬作癢作痛出水者亦照前用中等藥擦凡擦藥仍須內服煎藥兼之煎藥方 防風荆芥銀花防已白芷連翹苡仁白鮮皮桔梗川芎當歸赤芍生地黃連黃柏知母牛

膝木通陳皮羌活獨活粉草梔子各等分加土茯苓乾者四兩鮮者八兩水六碗煎至三碗分三次一日早午晚服完自擦起之日服至七日發口止虛人加人參二三錢

痔漏消管藥線 妙靈方用藥先用燈心試其深淺頂至極痛處爲率以藥條如式送入漏口三日後又試內根漸漸生肉條漸漸短用藥直至滿而止玉簪花根白者佳焙乾四兩番打馬焙乾三兩馬兜鈴炒乾二兩磁石三錢煨紅醋淬三次共研極細末以麵打條或粗或細候瘡管用之通始化

去始再插

廣瘡 仙遺拾珠用膽礬三錢皂礬石黃青黛各  
二錢番打馬二錢硃砂五分爲末猪脂一塊搗勻  
夏布包擦手足心候腹鳴卽止病自愈

膿窠瘡 慈航活人書斑毛三個麻黃二錢番打  
馬三錢樟冰五錢臘猪油二兩先熬化次入斑毛  
煎焦撈起再入麻黃煎焦撈起再加番打馬末同  
樟冰調勻搗破瘡頭以藥點上立時結痂次日全  
愈

老材香

山陝等省無漆民間棺殮俱用松香黃蠟塗於棺內數十年後有遷葬者棺朽另易新棺其朽棺內之香蠟名曰老材香土人用合金瘡藥按脂蠟乃先天流液之精又得土以固其力藉血肉餘氣以凝其神是一物合三才之用故入藥功效倍於他草木也○藥性考北地古棺中松脂合金瘡藥止血極效

治跌打損骨止金瘡血出生肌定疼神效盧氏仙方金瘡鐵扇散中用之

縛木藤

綱目藤部有省藤卽紅藤集解云堪縛物主治止  
言去風殺蟲無腦漏治法

治腦漏 急救方用縛木紅皮藤燒存性爲末每  
用酒服三錢服後覺有一線從鼻至脊背而下股  
其腦漏隨愈一人一年服一次效

腸癰 經驗廣集凡腸癰生於小肚角微腫而小  
腹隱痛不止皮色不變是也紅藤一兩許好酒二  
碗飲醉卧午後用紫花地丁一兩許亦以好酒煎  
服後痛必漸止再服

敗琉璃 浮子



本草綱目卷之九  
係羊角所造有五色惟白者入藥佛前十餘年者  
良去淨油垢新瓦煨研

退管漏湯火傷乳痛 急救方用琉璃片燒灰存  
性食後酒服一錢卽消

救生苦海退一切管秘方手指甲炙黃研細象牙  
剉末研細山甲炙黃研細乳香沒藥俱炙硃砂水  
飛舊琉璃燈底佛前白者用三十年者佳如若難  
得十餘年者亦可用打碎麩炒爲極細末各三錢  
合勻再研用黃蠟四兩化和爲丸如椒大初服五  
粒次服六粒每日加服一粒加至十四粒止其服

十日計服九十五粒至十一日每日減一粒至五粒仍舊逐日加上一粒加至十四粒又逐日遞減一粒如此週而復始或服至十四粒每從五粒服起更妙每日空心陳酒送下管漸褪出褪盡爲度如若未盡再從頭服起神效秘之秘之

內消痔管神方

陳直夫躬行錄載此方治痔管

如神有一小兒從高墜下傷背脊骨月餘後生毒潰爛成漏蛔蟲從漏孔中出經云外癰透膜者死內癰透膜者死此症已屬不治直夫用此藥一料而愈亦奇方也凡諸般漏管皆可服不獨痔管耳

琥珀燈心研末象牙屑焙血餘須自製蝟皮陰陽  
瓦台好泥封煨存性甬前茅茶舊琉璃底剪碎製  
法同蝟皮蟬退炒人指甲不拘手足俱可用瓦上  
焙脆爲末穿山甲炒脆當歸白茯苓猪懸蹄甲殼  
夾剪剪碎製同蝟皮蟻蝦瓦炙牛皮膠酒煮化和  
藥如不足加煉白蜜以上之藥各三兩小蜂房十  
個製同蝟皮火候更宜輕勿煨成灰蛇退十條剪  
碎瓦上炙煨自作汁將凝卽覆存性否則過性矣  
爲末同阿膠和搗搥丸每日早午晚服三錢滾水  
送下一料自愈已驗過數十人

痔潰成管 俞曉園鈔方尅蛇龜活者一個泥裹  
擇朝南牆下背陰處煨烟盡爲度去泥用多年白  
琉璃底一具琥珀象牙各三錢珍珠西黃冰片各  
五分爲末摻之此藥亦可服每服九分

肺癰 傅信方陳年琉璃煨灰存性陳年油絮漆  
匠店有煉成灰和勻酒服試驗神效

尿血 救生苦海用舊琉璃燈洗淨剪碎入磁罐  
內泥封火煨以紅爲度待冷取出酒下三錢

輕粉結毒 救生苦海用舊琉璃燈燒存性研每  
服二錢毒在上者川芎湯下毒在下者牛膝湯下

輕者十日重者一月全愈。○濟世方用佛前照過舊琉璃燒存性酒調下日一二次一月全愈。

凡人火燒 取廟中琉璃浮子松樹厚皮做的燒灰放地上上用碗覆蓋灰上存性研末用洪塘真香油調敷。

臘利瘡 百藥備遺用陳年佛前琉璃只取底用瓦上煨存性爲末真麻油和搽。

喉癬 選奇方用陳年琉璃煨爲末一錢加薄荷末白礬砂各五分冰片少許和勻吹入立愈。

敗毒散 不問新久腫毒癰疽發背疔瘡皆治家。

寶方琉璃陳年破損者一個棟樹子四兩舊髮網巾一頂鳳凰衣四十九個三七一錢敗龜板炙五個共爲末每服五分棟樹子湯下

男女癩瘡 家寶方先用白蘿蔔打爛貼瘡口上一日一換三日毒血去盡再用後藥松香一兩杏仁三十粒去皮尖油黃丹八錢輕粉五錢舊琉璃燈三錢火焙爲末研細麻油調搽一日一換數次卽愈

癩痺 雲谷醫鈔多年佛前舊琉璃焙存性麻油調搽癩痺卽消

散結核 石臨初結核論凡馬刀瘰癧一切結核  
用破舊琉璃煨存性爲末每服二錢取微汗此物  
乃羊角製成能療節中結氣佐以養血和榮清熱  
解毒之品標本並治乃佳○散結湯熟地當歸白  
芍川芎丹參丹皮柴胡桔梗元參白蘇各等分水  
煎沖琉璃末同服

頸上癭瘡 舊琉璃燈燒灰菜油調搽神效

長明酒 種福堂方治痔漏神效用積年舊琉璃  
燈洗淨油膩火煨研細以紅酒服四錢不過七日  
管自退去

治遍身漏 醫宗彙編云驗過良方用陳年琉璃  
底三錢人指甲麩皮炒一錢象牙末一錢辰砂一  
錢蟬退去土五分沒藥去油八分白礬八錢如漏  
在上身加川芎六分在下身加牛膝六分其爲細  
末以黃蠟三兩溶化入前藥和勻衆手急丸如菉  
豆大初服七八丸每日加一丸至十六七丸止無  
灰好酒送下上身飽服下身饑服最忌雞及一切  
有葱之物

油胭脂

藥性考油胭脂平豕膏合就潤膚舒裂活血點痘



西北風高塗舒面皺不龜手藥古名非謬。一名  
碗兒胭脂用小錫碗盛故名色紅潤如膏。百草  
鏡製造油胭脂法紅花汁一杯白蠟二兩微火熔  
化攪勻傾於磁盤內待成薄餅用碾麵杖碾數百  
遍則膠粘如膏藥矣假者係胭脂腳所造不入藥  
治血解毒治痘疔塗蜂咬王氏準繩同珍珠末塗  
治痘瘡燕窩疔。救生苦海痘初起時預免壞眼  
用臨清濟甯好油胭脂點眼大皆。普濟方有四  
聖丹治小兒痘中疔或紫黑而大或黑壞而臭或  
中有黑線此痘十死八九惟牛都御史得秘傳此

方點之最妙用豌豆四十九粒燒存性頭髮灰三分眞珠十四粒炒研爲末以油胭脂同杵成膏先以簪挑破啞去惡血以少許點之卽時變紅活也

乳頭破裂

油胭脂蛤粉水飛敷之

不用蛤粉亦可

治疹子眼

眼科要覽用雞膽將油胭脂調勻塗

上雖眼突出能好無雞膽用田雞膽代之亦可

木套皮

古爲屐今名木套

治血風瘡 救生苦海用木套皮燒灰東丹礬各

一錢爲末菜油和搽

火漆

火漆乃造胭脂紫梗水以染脂胚所漉之渣滓也  
紫梗本名紫鉚出波斯真臘南番等處有小蟲如  
蟻緣樹枝造成正同造白蠟一般吾杭造胭脂者  
藉以染製然第用紫梗一味則色不能紅必須配  
以黃葉水同煎色始紅豔其所餘之渣則火漆也  
入藥只須研極細用之中有枝梗不受研者篩去  
物理小識火漆一名紫膠

治血崩 救生苦海火漆不拘多少入無油淨鍋  
內令化炒黃烟淨見白烟起退火取出研末空心

時好酒和服三錢重者不過三服

腸風下血 不藥良方火漆三錢研細末以豆腐皮牙包作三十包白滾水送下至重三服卽愈

九種心痛 神方考用火漆一味燒灰存性每服一錢送下卽愈

### 七氣罌餅

此乃人家屋簷脊上用壓鎮不祥者以七小罌橫疊相聚如七星狀外以灰泥粘覆入藥用年久者王子接絳雪園方罌小口瓶也七氣者日月風雨露霜雪也七罌人家多置古屋上廣漢前上層生

餅年深者良火土結成堅剛性利復藉天之七氣能透骨入髓理傷續絕入藥取純鋼剉生剉末研至無聲水飛用○慈惠編接骨七釐散中用朝天寶卽人家屋上瓦將軍前小瓶也愈久愈妙必要取其朝天之得精華者研末入藥用

接骨丹 絳雪圍方七氣罌口剉末水飛一錢占文錢有半兩五銖自秦漢鑄紅銅者佳唐時開元錢亦可用火煨醋淬七次研至如塵粉無聲爲妙用五分與罌末和勻每服七釐先用甜瓜子仁去殼三錢嚼爛吐出拌藥再服下清酒過口此方用

七氣罌口古文錢功專腐蝕壞肉陳藏器云能直入損處鐸人斷骨甜瓜子仁開腸胃之壅遏通筋骨之機關因丹藥釐數微甚助以入胃轉輸爲丹藥之嚮導也

紅褐 白褐

紅褐乃毛布今名褐子西人多以牛羊毳雜織而成以茜草染則色紅

治疔瘡 醫便用紅褐燒灰存性五錢乾桃樹上乾者燒灰存性五錢爐甘石火煨黃色童便淬七次二錢五分其爲細末臨搽入片腦少許其瘡先

用椒葱湯洗淨再搽藥三次卽愈

血崩 醫便六合散治血崩不止諸藥不效用此  
立止此急則治其標也杏仁皮燒存性香附童便  
浸三日炒黑舊紅羯子燒存性地膚子炒舊棕薦  
燒存性壯血餘燒存性蟹殼燒存性陳蓮蓬燒存  
性共爲末每服三錢用酸漿草汁一鍾沖上熱酒  
一鍾空心熱服按此方初服反覺多以漸而少由  
紫色而紅以至於無卽止旣止之後用十全大補  
湯二十劑調補方斷根矣

走馬牙疳 祝氏效方黃蜆殼煨存性研末一錢

五分黃連忌鐵器爲末五錢括蕞根瞻礬燉五穀  
蟲要尾全者佳瓦上煨存性紅搗燉存性以上各  
五錢爲末加冰片二分和勻先以米泔水漱口連  
吹數次卽愈吹後仍用泔水漱口淨去

治臍血臍濕 救生苦海用紅搗燒灰油和敷或  
用裁衣店中百家碎五色布燒灰摻之

清香散 治癖疾生牙疳潰爛臭穢 萬病回春  
用乳香沒藥孩兒茶輕粉炒象皮炒灰象牙焙黃  
紅搗炒灰珍珠焙黃海巴焙乾各等分爲細末搽  
患處立時止痛生肌如神



本草綱目拾遺 卷九  
白褐

治小兒牙疳集驗方銅綠水飛雄黃水飛五倍子  
炒焦枯礬白褐燒存性烏梅肉炙乾細辛去葉蘆  
炒焦胡黃連炒焦共八味各等分用老茶葉葱根  
煎湯以雞翎洗去腐肉見鮮血然後用此藥搽上

醫布

粵山錄出新安南頭醫本芒蔴所治漁婦以其破  
敝者剪之爲條縷之爲緯以棉紗經之煮以石灰  
漂以溪水去其舊染薯蕷之色使瑩然雪白布成  
分爲雙單雙者表裏有大小絮頭單者一面有之

絮頭以長者爲貴摩挲久之歲隄然若西氈起絨  
更好或染以薯蕷則其絲勁爽可爲夏服不染則  
柔以禦寒粵人甚貴之亦奇布也

小兒服之可辟邪魅

舊帽沿

治疳毒 外科正宗下疳用油透羅緞舊帽沿燒  
灰杭粉瓦上煨黃色等分研極細先用紅棗十五  
枚甘草三錢煎湯洗後

金瘡 集聽方用舊氈帽油口沿燒灰摻之愈

綿珠

綿有木綿絲綿二種惟絲綿製服則有珠新製衣  
每每有絲珠透出衣外周履靖羣物奇制云伏中  
裝綿布衣無綿珠秋冬則有以燈草少許置綿上  
則無珠也入藥用舊衣內綿珠取其襲人氣既久  
其新衣透出衣外綿珠無用也

治蝮虎咬香油調塗神驗

紅絨

治秤勾瘡此症小兒月內糞門上忽有瘡孔卽此  
症也救生苦海用紅絨燒灰二錢珍珠五分輕粉  
五分兒茶二錢血竭一錢乳香一錢爲末乾摻

棉紗

養素園方此乃草綿花所紡線也吳松人以之織布名曰棉紗本色者白或染藍靛作青色爲婦人縫紉之用古用木棉今用草棉綱目服器部有綿乃絲綿故從絲

性平能透斑疹 傳信方風疹斑瘡出不透快用白棉紗二兩檉柳一兩共煎湯浴之避風頃刻透發無檉柳以櫻桃核代之亦可煎服

藍棉紗 此乃經靛染者煎湯解毒與藍汁同功  
舊頭繩

百草鏡俗名紫根乃婦人以之紫髮入藥取油透棄去者良綱目有巾及繳腳布而無此

治紅絲疔蛇傷紫束肉上能令毒氣不透

小兒一切頭瘡 秦中用云燒灰油塗立愈

治難產 經驗廣集用婦人舊頭繩一條燒灰加人參一兩煎服不論橫生逆生服之順流而下矣神奇不可思議

北雁砂

出關東菜豆色如珠顆粒擲碗中有響聲者眞明目

治一切眼病 洪清遠方用明目砂五分用針刺入紅者佳北雁砂三錢再用羊肝一具連膽不落水刺開數路不要剖開將二味砂爲末入肝內以無灰酒二觔蒸熟煎刺二碗空心一服晚飯後一服以盡量爲度羊肝配之一服完不論眼病內障外障黑暗不明無不神效

烏金紙

皮金紙

江浙造紙處多有兩面黝黑如漆光滑脆薄不中書畫惟市舖用以裹珍寶及藥物作襯紙又呼薰金紙以其熏黑撻研而光也

物理小識造金箔隔碎金以藥紙揮巨斧捶之金已箔而紙無損紙初褐色久則烏金色○魏良宰云烏金紙惟杭省有之其造紙非城東淳佑橋左右之水不成其法先造烏金水刷紙俟黑如漆再熏過以槌石研光性最堅韌凡打金箔以包金片打之金成箔而紙不損以市遠方價頗昂值蓋天下惟浙省城人能造此紙故也

治下疳 集聽用烏金紙銅杓內炒末加水片少  
許塗

復明散 陳嘉木眼科要覽專治翳膜遮睛瞽者

亦可復明用七八歲童子口中吐出虻蟲一條用  
竹刀剖開清水洗淨將新瓦以炭火焙乾勿焦研  
極細末烏金紙包好再用礪砂四兩將虻蟲包藏  
其中一七日取出以骨簪蘸藥點眼一日三次後  
將骨簪腳撥去眼中翳膜熱水洗之少頃又點點  
完此藥無不重明

皮金紙

又名羊皮金出廣東凡金箔店皆有售者呼皮金  
紙

治跌仆擦傷釘鞋打傷足跟病久陰瘡擦痛并凍



瘡足跟癰爛流水凡小擦傷刀傷腫潰紅赤皮光  
潮濕皆效看患處大小以此剪取將金面貼傷處  
過宿即愈

毛世洪  
養生集

### 舊繖紙

綱目有桐油繖紙止言治蛙幹陰瘡及疔瘡疔汗  
而已無他治法今補之

治纏腰丹 急救方用舊繖紙燒存性爲末香油  
調敷

對口瘡 祝氏效方淡底白色者佳一兩陳繖紙  
燒灰五錢將烏梅肉一兩先打爛入末再加生桐

油搗勻敷患處漸愈

發背立效方 周氏家寶千年石灰研爲細末鐵杓內炒紫色傾出磚上待畧冷微有熱氣不可太冷太熱三錢大川芎研細末二錢和勻入眞麻油五六點用井水或河水調服遍身大汗出卽散矣若遇惡瘡可加黑繖紙灰三分照前服

癩瘡 蔡毓晉方用人家蓋牆頭舊繖須多年經霜雪者取繖衣依瘡大小剪成一塊上用木針刺洞貼上三日另換一張每日翻貼貼上三張卽愈

○集聽方癩瘡以輕粉猪骨髓研勻攤舊繖紙上

貼之

周氏家寶諸瘡隔紙膏  
疔瘡經驗膏  
隔紙膏  
脫身  
隔紙膏俱用舊繖紙夾藥貼

包烟紙

此乃烟舖內包烟外一層厚白紙係石灰槽浸造  
灰氣未去紙亦不韌止可包烟用名建紙近人食  
烟以其紙擦烟筒頭嘴令銅潔白可擦錫器武原  
朱進士醒莽言北方朝士多貯此紙每日清晨盥  
頰後以之拭面久之能轉黝爲白令光發如玉  
拭面去黝汗斑美容顏發光豔

粗草紙 廁草紙

此乃稻草所造南貨店以之包物有厚薄二種厚者名銅板草紙入藥用

發疹瘡 百草鏡折角草紙半張南貨店包物厚者是也煎服較檉柳尤透發

小兒臍瘡 不藥良方急用大草紙燒灰敷之則不致變瘋癩或加枯礬或再加龍骨燒灰等分入麝香少許撒之

腸風下血 不藥良方粗草紙燒灰砂糖拌勻開水服

貝母團 經驗廣集治羊兒瘋百發百中用川貝  
母去心一兩研粉用羅篩過鋪大草紙一百張一  
層草紙篩一下百張草紙篩百下然後用線縫之  
入四碗水煮乾每清早取一張紙成團煨過滾湯  
泡汁飲之服盡全愈神妙無比

廁草紙

此乃坑廁中拭過糞草紙棄於地者同壽錄云傷  
寒內有一症名略蒂傷寒非用此不能除也覓此  
紙四十九張燒灰爲末水二碗煎一碗去渣飲之  
效

酒罈上紙

此乃蓋封酒罈口上紙陳久者佳以其得酒氣多  
徽爛不堅韌又脫去灰性也

治皮膚間忽然血澱出同壽錄用此紙碎扯如楊  
花攤於血出處卽止

燒酒草

此卽燒酒罈頭泥中之草慈航活人書有此一種  
入藥故補之

治剪刀風 活人書云其症腰生紅瘰如物纏緊  
作痛用針挑出血取此草加鹽擦出汗卽愈

古瓦

綱目土部有烏古瓦不言治癰毒

治小兒生毒 救生苦海已成形 多年古瓦

研末用細茶葉煎極濃汁和敷留頭卽散

蟻拱癰 用瓦片火煨醋淬七次爲末菜油和搽

消渴 用舊屋上瓦兩片洗淨槌碎以水煮濃汁

食後溫服一小盞 同壽錄

青龍背

龔廷賢回春云鍋蓋面上垢膩名青龍背可治療  
瘰癧爛久不愈者用此入烏龍膏治之

烏龍膏 木鼈帶殼炒存性去殼側柏葉焙人中  
血卽亂髮也燒灰青龍背紙錢灰飛羅麵各一錢  
俱爲末好涼米醋調成膏塗瘡上外用紙貼

絹篩羅

今呼篩子有馬鬃織作底者有絲絹作底者入藥  
以絲絹者良

治過月難產 彙集有急救過月難產仙方用陳  
篩羅底一個捲筒燒碗內與產婦服卽下如產生  
之兒身上皆有羅其驗如神

陳年竹燈盞



治多年陰陽諸癩 救生苦海用陳竹燈盞油透者入尖底瓶內瓶口安一鐵絲髻將地挖一土坑內安大碗一隻將瓶倒覆碗上瓶底朝天週圍用糞糠填滿燒之取滴下碗中之油搽之效驗○文堂驗集治癩多年油竹燈挂一個火上烤出油汁如膠者良另將五倍子去蟲炒研爲末二味和一处用陳醋火上溫熱和勻搽之甚效

臘梨頭瘡 張子卿秘方集驗以酒飯店油透陳竹燈臺一個劈碎裝於磁瓶內口上用舊髻鐵絲覆於餅上倒轉下再用一空磁餅以此餅合於下

餅口上用火煨之其汁溜下取汁搽瘡其效如神  
腦漏 百草鏡竹燈絡子十年者須覓鄉村中有  
油垢者勿淨煨成炭伏土存性研細每用一二錢  
包豆腐皮清晨滾水吞下陸續服盡自愈

腸癰肚癰神效方 便易良方云右腳拘急是腸  
、癰左腳拘急是肚癰取數十年舊油印竹燈臺俗  
名善福以一隻燒半過不用水息悶合成灰研爲  
細末陳三白酒沖服二錢或三錢卽愈王站柱不  
藥良方云此藥又治肺癰極神效

銅燈盞青

卽盞內之油垢起銅綠者入藥良

治燕窩瘡 救生苦海本名髮際瘡生頭枕骨下  
髮盡處以銅燈盞內青垢刮下研爛擦之如神

### 料絲

物理小識滇金齒衛用碼礪石英屑汁以北方天  
花點之乃凝練爲絲以作燈近日丹陽松江皆能  
作料絲李西涯書作繚絲大內青瑣卽此物

磨漿能止血破血

### 烏龍翅

汪連仕草藥方烏龍翅卽焦火把零落泥土中經

霜雪者佳

治足爛至凶者燒炭油搽燒斑痧焮神鬼箭神效  
船篷箬

治耳內腫爛脹痛 救生苦海用多年船篷箬燒  
灰存性加水片少許研細吹入

洋船璞

此乃海船底中間有櫬木舟人名曰龍骨藥生其  
間形如菌蕈乾之入藥

治胃脘疼痛

按潘之恒廣菌譜舵菜即海船舵上所生菌也不

可多得果爾則宜入蔬部留以俟考

檣箍

治奶串○毛世洪經驗集凡乳癰串爛年久不愈  
洞見內腑深陷不愈者取搖船之檣上首手捏之  
處舊藤箍剪下以陰陽瓦上煨末竹管紮棚篩日  
日搽之如乾處以香油調搽不過半月全愈

漆盤上漆

治羊眼漏 救生苦海此症生足脛骨上生一孔  
無膿無血惟流清水大痛用多年漆盤刮下漆燒  
灰摻之愈

油木梳

木梳以木製成用以通髮黃楊木者能清火石楠木者理風其器以此二木造者爲最餘雜木及駝骨牛角等梳不入藥或曰牙梳可辟邪皂角木梳不腫髮柏木鉛梳皆能烏髮總不若常用黃楊石楠二木爲佳也綱目梳篦合一不分所載治法亦夥惟油梳尙遺其功用因補之

治肺痿 救生苦海油木梳須二三十年者一個燒存性滾水和服甜酒亦可

治五淋 同壽錄以多年木梳燒存性空心冷水

調下男用男梳女用女梳神效

拘頸 海上名方此病俗呼落枕乃頸項夜間悞落枕下或偶被閃挫血滯而強作酸疼以舊油梳火上烘熱梳背於疼處極力刮之自愈

誤食螞蝗 俞潛山云曾誤食此腹中作瀉不時疼痛瀉血以黃土漿水他藥試之多不效有教以取多年舊油梳煨灰酒調服一夕蝗皆化水而下真神方也

衣帶

治蛇纏 救生苦海用繫腰帶煨存性研細和好

膏塗或加水龍骨和柿漆水塗

刀鞘

治中惡腹痛 救生苦海用刀鞘燒灰水服

舊竹筴

治蜈蚣傷 救生苦海將小頭燒過伏土取少許  
研細敷之立愈

草鞋鼻上布

綱目屨屨鼻繩下有草鞋鼻無取布法亦不知其  
有發瘡之功今補之

治兒患瘡疹不發取破草鞋鼻上所裒之布七八

本草綱目拾遺

卷九

刀鞘

舊竹筴

草鞋鼻

瘡疹

瘡疹

五



條煎湯服立效如神

周寶生醫通

織機上草辯

楊春涯驗方治白蛇纏此物以陳爲好燒灰存性  
麻油調搽紅蛇纏亦治

肉臺上屑

綱目故木砧條列几上屑止言治噉瘡唇耳等瘡  
乾霍亂蟲牙等症急救方言其治手毒如神因急  
補之

治手掌連虎口邊腫毒用猪肉臺上刮下木屑如  
膏作餅貼患處卽愈

吐血 慈航活人書醃臘肉店中切肉木墩上刮  
取肉垢火上燒枯勿令成白色存性研末酒沖服  
狗咬 楊春涯驗方刮取切肉墩上油垢和砂糖  
拌敷神效

盛米栲栳 爛籬底

治血毆 楊春涯驗方用二三十年盛米栲栳一  
隻擊碎煎湯服一二次卽消

爛籬底

此乃人家盛米竹器浙人呼爲淘籬以竹絲織成  
用以浙米者舊者多用以貯柴灰淋水洗衣年久

則爛

截經 同壽錄云婦人行經不止服此可截用頭  
紅花爛籬底爛入搭草鞋鼻子連房此四味俱燒  
灰存性其爲末每服一錢黃酒送下不過三服其  
紅立止

砂壺

出宜與紫泥者佳入藥吸毒用取其口光滑而薄  
不傷肌肉也

治傷寒不出汗用吸法以一砂壺各盛燒酒八分  
重湯煮滾將酒傾去卽將壺口對臍上合住使吸

之緊輪換汗出卽愈。○瘰癧破爛拔毒法將先破處麵糊作餅貼上用小砂壺二個燒酒煎滾去酒以熱壺口覆於麵餅上熏瘡如拔火壺一樣壺冷又易一壺如此數次將毒氣拔盡卽愈熏後用猪膽熬成膏貼瘡口此方神效。○治獸蟲咬傷并風寒一切毒用砂燒酒壺二個盛大半壺燒酒先以一壺火上令滾無聲傾去酒卽按在破口上拔出汚黑血水滿則自落再以次壺仍按瘡上輪流提拔以毒盡爲度。俾見經按王站柱不藥良方治瘋狗咬傷用砂壺吸法與此同吸後再拔去頂上紅

髮卽愈

靈鶴蓋

李金什曾客淮南言山陽一帶洲渚皆蘆葦產鶴多卵育於中村人有能識其期者俟鶴下卵後竊歸入鍋煮熟急以涼水沃之看卵殼不熱復置其窠鶴不知而尤煦伏之過三七日其卵中黃白復鮮如故又竊之歸急煮而又納窠鶴又伏之如是者三次則鶴卵外殼厚如紫玉而盃成矣復竊之歸鏟去其頂外則鑲飾金玉令成盃形名靈鶴蓋注酒其中輒有一小鶴影浮酒上云食之益壽延

年且能治心疾不易得有市者價亦不貲

安神魂定心悸小兒用之除驚癇孕婦用之養胎  
稀痘出外帶之辟蛇蟲及一切毒

### 花簪

楊春涯驗方治乳癰初起時將女人頭帶花簪對  
向日中打圈口中默念天上一朶黑烏雲地下女  
子害乳疼我今特授金簪上金簪化去永不疼如  
此七遍將簪交付婦人圈患處卽好

### 小兒破鞋

接骨 家寶方用市鎮上乞小兒破鞋一隻燒灰

白麵等分好醋調成糊敷患處以絹束之杉木板夾好須臾疼止骨接有聲爲妙

### 夏布舊蚊帳

江西麻布染藍入夏作蚊帳名夏布今人以此舊帳作漆器坯最佳

治走游風 王化九簡便方用青夏布舊蚊帳燒灰存性麻油調敷如再發再敷

陰奇癢難忍 不藥良方用青夏布舊蚊帳燒灰存性麻油調搽卽愈

### 廁上椽木 尿板

此卽毛坑上椽子多年爲糞氣熏漬其解毒之功  
不下糞清也

治紅絲疔 敬信錄紅絲疔先將針挑斷其絲將  
多年糞坑上碎木椽子煨灰研細用飴糖拌塗留  
頭疔卽拔出

尿板 治手足瘡無力不能收口家寶方用多年  
尿浸爛白色木板煨存性爲細末加冰片摻之立  
時收口

### 白秋霜

萬表積善堂方白秋霜卽多年糞缸底結成白霜



須經風雨者入藥炭火煨紅醋淬九次用綱目人部溺白堊爲人中白乃溺塗也且所列主治及附方皆無接骨治傷之說特補其缺

治跌撲損傷閃挫骨傷極重者研極細末每服五分好酒調下萬表

陳海曙云凡多年廁坑底石板背後有白胎如雪結其間鑿取微有穢氣陳久亦無然糞力透石故其精華凝聚於此能清火毒。王聖俞云一名糞霜曾見小兒瘡痘初愈者忽然肺燥咽乾脣裂目中出火滿面紅赤此火毒壅遏未化滯於上焦每

服此藥一二錢不數日全愈。敏按蔣儀藥鏡云  
泥宿糞坑之底疔，其發背止痛當塗而霜又其精  
華也大抵清火解毒功用亦不甚相遠。

禽部

燕窩素燕窩

一名燕蔬菜從新云出漳泉沿海處有之乃燕啣  
小魚春壘之窩中人取之閩小記云燕取小魚粘  
之於石久而成窩有烏白紅三色烏色品最下紅  
者最難得能益小兒瘰癧白色能愈痰疾泉南雜  
志閩之遠海近番處有燕名金絲者首尾似燕而  
甚小毛如金絲臨卵育子時羣飛近沙汶泥有石  
處啄蠶螺食之蠶螺背上肉有兩肋如楓蠶絲堅  
潔而白食之可補虛損已痢勞症此燕食之肉化

而筋不化并津液嘔出結爲小窩附石上久之與小雛鼓翼而飛海人依時拾之故曰燕窩也似此則形狀功用時候族類俱有可信。嶺南雜記燕窩有數種日本以爲蔬菜供僧此乃海燕食海邊蟲蟲背有筋不化復吐出而爲窩綴於海山石壁之上土人攀援取之春取者白夏取者黃秋冬不可取取之則燕無所棲凍死次年無窩矣。香祖筆記燕窩紫色者尤佳。崖州志崖州海中石島有玳瑁山其洞穴皆燕所巢燕大者如烏啖魚輒吐涎沫以備冬月退毛之食土人皮衣皮帽秉炬

探之燕驚撲人年老力弱或致墜崖而死故有多  
獲者有空手而返者是爲燕窩之菜○粵錄海濱  
石上有海粉積結如苔燕啄食之吐出爲窩繫繫  
巖壁之間島人俟其秋去以修竿接鏟取之海粉  
性寒而爲燕所吞吐則暖海粉味鹹而爲燕所吞  
吐則甘其形質盡化故可以清痰開胃云凡有烏  
白二色紅者難得蓋燕屬火紅者尤其精液一名  
燕蔬以其補草木之不足故曰蔬榆肉產於北燕  
窩產於南皆蔬也○宦遊筆記燕窩出南海日本  
諸國春間取者色白爲上秋間取者色黃次之一

種微黑而多毛是揀擇所遺者價亦不能廉怯症  
人久服之亦能潤肺止嗽功等參苓○查浦輯聞  
南燕歸海外水邊難達因啄小魚肉作窩口啣之  
而飛飛倦卽投窩水中棲止其上少息復啣之而  
飛故東南風則飄掠近岸人就取之○阮葵生茶  
餘客話許青巖 松佶 方伯語予云燕窩產海島中  
窮巖邃谷足力繩竿之所不及估船養小猿猴善  
解人意至山島間以小布囊繫猿背上縱之往升  
木深巖盡剝塞囊中而歸猿之去也苦不得食三  
數日始返海客以果餌充囊中俾之遠出不餓拙

者出卽剝塞囊中歸而傾囊不過數片爲果餌占地也其黠者將果餌傾巖竇間剝塞滿囊盡燕窩矣空而復去尤爲便捷猿一值數百金價數倍於拙者云許謹齋黃門每晨起食蔗漿燕窩一巨觥以融軟爲度謂他人皆生食也終日不溺

味甘淡平大養肺陰化痰止咳補而能清爲調理虛損勞瘵之聖藥一切病之由於肺虛不能清肅下行者用此皆可治之開胃氣已勞痢益小兒痘疹可入煎藥或單煮汁服。從新云今人用以煮粥或用鷄汁煮之雖甚可口然亂其清補之本性

豈能已痰耶有與冰糖同煎則甘壅矣豈能助肺  
金清肅下行耶。物理小識燕窩能止小便數。  
逢原云甘平無毒烏啣海粉作窩得風日陽和之  
氣化鹹寒爲甘平能使金水相生腎氣上滋於肺  
而胃氣亦得以安食品中之最馴良者惜乎本草  
不收方書罕用今人以之調補虛勞咳吐紅痰每  
兼冰糖煮食往往獲效然惟病勢初淺者爲宜若  
陰火方盛血逆上奔雖用無濟以其幽柔無剛毅  
之力耳。張石頑云暴得咳嗽吐血乍止以冰糖  
與燕窩菜同煮連服取其平補肺胃而無止截之



患也惟胃中有痰濕者令人欲嘔以其甘膩戀膈故也。○食物宜忌云壯陽益氣和中開胃添精補髓潤肺止久瀉消痰涎。○嶺南雜記紅色者治血痢入梨加冰糖蒸食治膈痰。

何惠川云翻胃久吐有服人乳多吃燕窩而愈者老年痰喘。○文堂集驗方用秋白梨一個去心入燕窩一錢先用滾水泡再入冰糖一錢蒸熟每日早晨服下勿間斷神效。

噤口痢。○救生苦海白燕窩二錢人參四分水七分隔湯頓熟徐徐食之立效。

素燕窩 月湖筆藪近時素食中盛行一種素燕窩甯波洋行頗多形白而細長空心虛軟儼如食舖中餛子而細有七八寸至尺長不等望之晶瑩握之輕虛每三十餘枝作一束厨人買得湯沃之卽起脹蕤蕤然凝白類官燕以入素饌爲珍品食之亦淡而少味不知何物造成或曰糯粉山穀爲之何以見沸湯反脆美或曰銅鉛之苗產海外深山食之可明目近日始知有用者不知然否附記俟考。北硯食規有製素燕窩法先入溫水一盪伸腰卽浸入滾過冷水內俟作料配菜齊集另鍋

製好箊籬撈出燕窩將滾湯在箊籬上淋兩三遍  
可用軟而不糊拌爛用

解食烟毒

石燕

粵語產西樵巖穴中大如乳燕足生翼末綱目石  
燕條引日華子本草無治疔之說今廣人用之頗  
驗故補之

治兒疔小兒羸瘦取食卽愈諺曰嬰兒瘦探石巖  
卽此

蝙蝠腦

李氏蝠腦丸中用之治癰疽內陷服之能令毒不  
攻心

### 石錘

張氏日鈔乃大鵬之精也鵬獨運無鷓海靜不波  
之日見影在下以爲鷓也其精溢出墮土上爲土  
錘木上爲木錘惟石上爲不失本性最佳或墮水  
中以婦女衲衣投水自能躍出

按石錘乃慎恤膠之類

浸酒服壯陽令人有子以薑酒解之

鷓鷃  
蛋

鷓鴣形如鷺而色黑面紅俗呼摸魚公水鄉人家  
多養之以捕魚十月後飼以狗肉則身暖不畏寒  
雖破冰入水亦不瘵死

治腎咳俗呼頓嗆從小腹下逆上而咳連嗽數十  
聲少住又作甚或咳發必嘔牽掣兩脇涕淚皆出  
連月不愈者用鷓鴣涎滾水冲服下咽卽止

蛋

能打胎有不欲留孕者取一個白水煮服胎卽化  
爲血水從小便出多則二服無有不驗

翠鳥舌

翠鳥卽魚翠也其舌大而可用綱目魚狗下止言其肉可治魚骨哽而附以翡翠亦云方書無用此者其功效大約相同今爲補其舌之用

針頭風 集聽翠鳥舌一個以桐油浸曬乾又浸又曬硬如三稜針方病發時將鳥舌於頭上亂針卽愈

白鶻雞

珍異藥品文首白翼黃足

治瘰癧

鬱雞

珍異藥品 西廣中。孫硤川云此物在山中多食  
鬱金苗故肉鬆脆

解鬱散結氣

豁雞

出廣中雞頭而鳥喙色黃腹毛純黑尾長下垂鳴  
聲豁豁性嗜蛇其哺子時取雞折其兩足乃以蛇  
飼之三日卽復屢折屢復

捕食之能治骨節折傷

雪雞

生西陲千百成羣棲止雪中西域聞見錄喀什噶

爾雪雞羣飛極肥美人以爲食惟性燥耳入藥雄者良

煖丹田壯元陽除一切積冷陰寒痼癖之疾較雪蓮尤效

洋鴨

朱排山柑園小識洋鴨種出海洋形如鴨紅冠羣羽馴而善飛雄者重至十觔雌者如常其性淫雌雄相交日必四五次故房術用之卵大如鷺子味極美以母雞伏之約一月餘則雛出矣雛極易長大



助陽道健腰膝補命門煖水臟

烏鴉膽

此乃慈烏之膽浙東最多悉體肥黑而大所在多有予門人奉化徐朋圭居白巖其地山僻徑幽古木叢雜言其土人有取鴉膽者云烏鴉膽汁晝則散注身目故精聚而能見烟霄外物夜則汁歸於膽取之法須伺鴉夜睡時乘其罔覺以利刀斷其頭急剖腹取之膽汁全飽並無漏溢然後以線穿陰乾入藥用若取之不得法或鴉被驚覺縱殺得其膽亦空皮無汁不堪用

明目開瞽功勝空青點青育最驗解藤黃毒

爛弦風眼及翳障 不藥良方烏鴉膽點之卽愈

鵝毛

屎

涎

蛋殼

喉管

綱目鴛下載其毛治射工毒通氣辟癩開噎其屎  
治小兒鴛口蒼鴛者可傳蟲蛇咬而不知毛可治  
癰屎更治犬咬悉爲補之

治癰毒 集驗方用鴛毛煨灰一兩明礬二兩研  
末麵糊爲丸每服二錢好酒下

大麻風 赤水元珠參毛丸治大麻風神效苦參  
一觔鴛毛八兩煨存性爲末陳米糊爲丸桐子大

每服五十九酒送下一日二次

神功至寶丹 王秋泉家傳秘方專治男婦溜膿

肥瘡膿窠瘡臘梨頭遍身風癩癰疹疥癬瘙癢異  
常麻木不仁諸風手足酸痛皮膚破爛陰囊癢極  
并婦女陰瘡濕癢酒丸散擦藥洗貼如神隨病上  
下茶湯送下日進二次戒暴怒房勞炙燂發毒之  
物苦參一觔爲末鷲毛香油炒存性六兩黃米糊  
丸硃砂爲衣此方與元珠治大麻風所用大同小  
異因並存之

按鷲白者能疎風瀕湖謂其氣味俱厚發風發瘡

莫此爲甚而駁韓忭醫通以爲疎風大悞殊不知  
鷺能發瘡生濕火熏者并發火毒宿疾害誠有之  
而疎風之功亦不可盡誣至其毛與肉則性尤不  
同本經逢原云昔人治癩風方中取純白鷺通身  
之毛及嘴足之皮與肫肝內皮固濟煨灰存性和  
風藥用之爲風藥之嚮導也然不可遺失一處遺  
一處卽不能愈又不可用雜色者若有一處色蒼  
風愈之後其處肌膚色黑正取其疎利而不燥能  
和風藥之燥烈而不用蒼色者以純白鷺無毒耳  
絕胎方 保和堂秘方用血管鷺毛燒灰百草霜

各一錢行經後酒調下終身無孕。又周氏家寶方用鷺毛一把煨細茶煎湯經後服永不生。此二方雖存不可輕用

寶生論有受打不痛法用血管鷺毛七根地龍七條煨過同乳香白蠟爲丸好酒送下

治瘰癧初起 傳信方白鷺大者二隻取週身毛翎并口腳黃皮新瓦焙焦爲末分作十服每日食後服之服完卽愈

治腫毒 救生苦海用血管鷺毛一握銅鍋炒焦腐皮包裹酒吞下卽內消初起者效。諸腫毒痛

甚有膿卽潰無膿卽消用鷲毛燒灰一兩雄黃三

錢川烏草烏各錢半黃蠟鎔化入前藥爲丸每服

一錢好酒送下嚴氏方諸毒內消方吳涵宇用鷲毛

二個炒蜈蚣十條醋炒穿山甲一兩炒蠶蠶一兩

炒全蝎五錢洗廣膠二兩炒桑黃二兩炒羊角屑

二兩炒共爲末每服三錢砂糖調好酒下以醉爲

度

發背疔瘡對口風毒 醫宗彙編穿山甲蛇蛻蟬

退蜈蚣俱爲末鷲毛全副燒灰存性全蝎血管雞

毛二翅燒灰人指甲用十分之一敗龜板一個僵



鷺屎

救生苦海治犬咬以鷺屎敷之不爛痛

鷺涎

綱目止載治咽喉穀賊今人治小兒鷺口瘡甚效

鷺蛋殼

急救方癰疽無頭用新生鷺蛋殼燒灰存性爲末

醋調敷立出膿血妙

鷺腿骨

奇效方犬傷日久發者用鷺腿脰骨煨存性研末

摻之



鸞喉管

家寶方治喉症用鸞喉氣管一個陰陽瓦炙黃色  
冰片一分共爲細末吹二三次愈

治赤白帶 家寶方取鸞水喉管煨存性研末酒

調臨臥服之

鷹吐毛

鷹條

百草鏡鷹每日食雀時連毛與食肉化而毛不化  
聚成一團如芡實大次早吐出收用入藥綱目有  
鷹毛無吐毛故補之。按鷹稟西方兌金之氣其  
性猛烈而竄捷故余居士以其頭治眩暈王燾以

其糞治食哽皆取其得庚辛銳氣一往無滯反胃之症食而復吐久積於胃不能運化故旋出大概由於憂鬱者居多取此復吐之意而又得其爽猛之性爲治其義精矣

治反胃煨存性研 醫方集聽查將軍家傳噎膈方用牙烏灑出毛肘卽鷹吐烏毛也要七個不可落地用布接在架中微火煨燥爲末服之營內凡喂毛肘但在下午次日天明卽吐出最易得不可使肘落地落地則不驗

鷹條 本經逢原云鷹屎中化未盡之毛謂之鷹

條入陰丹陽丹用不特取其翮之善脫以治難脫之病并取屎中未化之羽以消目中未脫之翳可謂妙用

### 雄雞卵

茅崑來云雞本南方積陽之象於卦爲巽五更則日臨巽位故鳴凡鳥雌卵而雄否惟雞則雄者間亦生卵乃陽極而陰乘之其卵較小於雌雞卵殼堅如石殼色微紅入藥用可安胎稀痘。王桺秋燈叢話古北口呶噠嶺有喇嗎令巡檢張某市雄雞卵張笑曰雄雞焉能生卵故相難也曰非也俗

有斯言卽有斯物第覓之可得也張漫應之語其  
役役曰聞前村民畜雄雞連生三卵衆以爲不祥  
姬異而藏之命役取送喇嗎收其一給價五十金  
張詢所用曰能醫眼疾年遠瞽者得其汁點之卽  
復明與空青同○陳藏器本草今雞有白臺如卵  
而硬有白無黃云是牡雞所生名父公臺二申野  
錄成化二十三年吳縣湯惟信家雄雞生卵平湖  
縣志萬歷四十八年四月施太史家公雞生子形  
如雀卵色紫史異纂天啟二年陝民王進榜家白  
雄雞生卵三岡識畧壬申二月二十九日提標左

營章元鼎解中雄雞連生二卵述異記康熙甲戌  
十二月松江吳南林家雄雞生卵大如鴿蛋殼甚  
堅厚椎破之亦有黃白白如凝脂不散黃帶赤色  
○質直談耳嘉定湖南村民錢嵩家雄雞生卵與  
雌無異乾隆壬寅夏間事○紀曉嵐先生云雄雞  
卵大如指頂形似閩中落花生不能正圓外有斑  
點向日映之其中深紅如琥珀以點目皆甚效德  
少司空成汪副憲承霈皆嘗以是物合藥然不易  
得一枚可以值十金阿少司農廸斯曰是雖罕睹  
實亦人力所爲以肥壯雄雞閉籠內縱羣雌繞籠

外使相近而不能相接久而精氣團結自能成卵  
此亦理所宜然然雞秉巽風之氣故食之發瘡毒  
其卵以盛陽不洩鬱積而成自必蘊熱不知何以  
反明目又本草之所未載醫經之所未言何以知  
其能明目此則莫明其故矣汪副憲曰有以蛇卵  
售欺者但映日不紅卽爲僞托亦不可不知也

敏按諸書所載雄雞生卵自古有之原非有異據  
陳藏器所說有白無黃而述異記所載則有黃有  
白想本間氣所生其形色亦無一定乾隆庚戌臨  
安慈聖寺有放生雄雞忽生卵日產其一如是旬

餘人以爲異其卵較小色紫而殼堅爲一錫匠索去子時適館臨安聞而索之已無有矣錫匠徽人亦云其卵白可入藥故乞之歸里然此物又不特入藥李懷白先生云曾見喇嗎誦黑經用雄雞蛋川中鬼師有用雄雞蛋以行禳者白蓮教則又需以解魘迷術今人徒詫其異而不知天生此正所爲世用也

安胎稀痘開瞽





獸部

獅子油

血

辛温有毒色微黑者眞善透經絡凡用勿多。沈  
良士云塗指甲上涼透指甲者眞又方以黍許入  
沸湯湯卽不沸者眞。○逢原云獅爲百獸之長性  
最難馴一吼則百獸辟易爾雅言其食虎豹熊太  
古言其乳入牛羊馬乳中皆化成水西域人捕得  
取其油入貢以供宮人滌除衣垢之用又能去紙  
上墨跡刮少許隔紙熨之卽脫予嘗試用垢雖去  
而衣易毀紙易脆僅供一時之用雖係方物方藥

罕用近世醫者以之治噎膈病蓋噎膈皆鬱痰瘀積所致用取滌痰之意試之輒驗由是方家爭爲奇物但性最猛利力能墮胎孕婦忌用象油亦能去垢滌痰但不能去墨跡耳。椿園聞見錄溫都斯坦西域一大回國從葉爾羌西南行百日可到其國西隅有巨澤圍數千里澤中有山圍逾千里鵲峰聳峙高入雲天或曰人間第一高山也名曰肇各里麻膽達喇斯山中產獅子於新月皎潔輒負雛於山中往來頭大而毛虬尾形帚黃質黑章如虎皮長六七尺時登山絕頂望月垂涎咆哮跳

擲猛飛吞月有飛去八九里十餘里而墜死山谷  
中者其國人以豢養獅子爲上戶每當秋月其汗  
使人取獅以精鐵作柱大如甌密布層遮圍畜之  
於中飼以牛時而吼如雷霆滿城震動人畜不甯  
取之法擇炮手之最精者開地爲阱人匿其中遇  
有負雛者來乘其不備發炮斃之而取其雛倘一  
炮不中則拋山裂石而人無噍類矣。○張萊漪有  
此油云熬之可挑絲一二尺不斷他油則不及也  
○陳海曙曾在京邸簡親王府見獅油堅如石絕  
如雞卵白潔可愛

朱排山柑園小識獅子油白膩如豬肪氣味俱薄  
利小便凡人小便不通雖腹脹莖痛病在危急者  
以酒或白湯送下三四釐或半牙卽通嘗有一丐  
因受暑熱遂致小便不通每月一發發至二三日  
後莖痛如割至不可忍屢投繯祈死人以獅油少  
許投之片刻卽通奏效之速無逾於此而本草不  
著其功用何哉豈當時未知用歟第虛秘者似宜  
酌而用之。敏按獅油性最猛烈內服尤不可單  
用更勿多服嘉慶元年三月予友邵某得獅油少  
許因病欲服之未果爲一鄉人轉乞去市於人獲

重價其人市得服半黍許夜半而死鄉人懼罪亦  
投水死蓋外用不妨內服尤宜審慎以人之腸胃  
太弱不任峻利之攻削耳

消熱結治膈大小便不通 救生苦海用獅油酒  
服二三釐自效

### 獅血

沈雲將食物會纂獅血殺百蟲燒之去鬼氣

### 獅糞

王沂堂藏有獅糞一段用鐵匣盛之四圍以鐵屑  
養之其形至堅如鐵石磨之作紅色云非鐵屑養

則易朽爛也

治一切腿足下部惡瘡年久不愈者塗之卽痂而落

象糞

象白尾毛

按象有家野二種京師者食俸料溟廣山產者食竹木雜草入藥以野象糞良京象糞銷皮坊皆多取濺黃貂黃狼能令毛黑如漆綱目象下凡牙肉睛皮膽骨俱入藥不及其糞爲補之

治鷲掌風以象糞燒熏自愈

起死回生散 李文炳經驗廣集治痘瘡至七八

日忽然變黑收入腹內遍身抓破吭喘死在須臾服此從新另發出立可回生當歸川芎白芍生地升麻紅花上陷加白芷下陷加牛膝遍身黑陷加麻黃象糞微炒如一歲兒用二錢大兒用至三五錢右判一劑水酒各半煎服從新發出腳下黑疔至七八日用針挑去以太乙膏貼之卽拔去毒連進二三服

瘡疹 良朋彙集方治小兒大人出瘡疹回在心胸作喘發燒用象糞八錢升麻二錢水二鍾煎一鍾服卽刻透出

本草綱目拾遺 卷九  
象白

乃象交於水其精浮水面象房人用磁餅收貯入藥敷面不皺亦可入房藥用

象尾毛

通雅云今人剔牙杖極重象尾謂可去火

犴血

孫含懿云有客自川中來帶有犴血言此獸乃星禽爲天上井宿五百年一降於世以濟人其降也必於蜀降之前三日天乃大風振屋拔木爲降犴風左右村落居民知犴必降悉遷避之求鐵工造



蓮萼箭鏃如橄欖形而窪其中鏃上刻名以記狂  
降之日形如胡犬有鱗大十倍於象首必朝歲星  
蹲踞不動土人從其後射之矢集其身如猶三日  
後乃去遺矢於地各認所鏃以歸矢人無爭者其  
鏃頭有血一塊大如欖核可入藥土人亦甚珍寶  
之不輕售自明洪武時曾一降至今幾四百年所  
珍藥亦罕有存者縉紳舊族或有之亦寶同和璧  
矣

治一切陰疽發背一切大毒凡癰疽必死之症無  
藥可救者每以一釐潰則敷膏外貼未潰則調酒

服一夕自愈合治癰等藥一觔加入分許卽奏效  
如神

醉虎

油 膽 脂

三岡識畧王子正月初十日福山戍卒遇一醉虎  
縛獻王大將軍轅門將軍剖肉分贈郡紳之小兒  
食之可以稀痘按虎食人與楊柳及狗皆醉

宦遊筆記載山人捕虎法云虎嗜食犬食之必醉  
如人中酒虎匿深谷峻嶺往來不時難尋其踪人  
以劣犬縛於山凹犬嗥不已虎聞聲而前果腹而  
醉不能遠去人迹犬血而捕之則無所遁矣此縛

醉虎之法也

主稀痘

虎油

物理小識虎一身皆入藥而本草未載虎油之功  
效愚於獵戶取其油以塗臘梨瘡一二次卽愈亦  
可治大麻瘋○藥性考虎油療禿塗狗咬傷五痔  
下血反胃酒嘗

虎腑

治打傷垂死飲食不進前後不通乃瘀血在心命  
在旦夕可用此方虎膽五分去外皮用老黃酒在

碗內研細爲末白茯苓二錢爲末用熱陳酒調灌  
下出可不死矣

### 虎脂

治打碎頭骨蓋方用虎脂一兩浸好熱酒內俟化  
勻服之汗出爲度如患處青者不治

反胃 不藥良方虎脂八兩清油一觔瓦瓶浸一  
月密封勿令洩氣每以油一兩入無灰酒一盞溫  
服以瘥爲度油盡再添

按虎膽虎脂綱目雖載其用而未言及入折傷料  
之用此二方出錫山華氏經驗錄並屢試有效故

補其說以濟急

鹿胎

乳餅  
脛骨

瀕湖綱目鹿條精髓筋膽胎糞俱各備載張璐逢  
原另列鹿胎一條頗詳辨可採錄出以補其遺璐  
曰胎中鹿其嘴尾蹄胎與生鹿無異者爲眞其色  
淡形瘦者爲鹿胎若色深形肥者爲麋胎慎勿誤  
用能損眞陽又獐胎與鹿胎相類但色皎白且其  
下脣不若鹿之長於上脣也其他雜獸之胎與鹿  
胎總不相似也入藥取眞者酥炙黃用  
氣味甘溫無毒鹿性補陽益精男子眞元不足者

宜之。不特茸角莖胎入藥而全鹿丸合大劑參耆桂附大壯元陽其胎純陽未散宜爲補養天真滋益少火之良劑然須參耆河車輩佐之尤爲得力如平素虛寒下元不足者入六味丸中爲溫補精血之要藥而無桂附辛熱傷陰之患但慎勿誤用麋胎反傷天元陽氣也

鹿乳餅

茗陰札記孝豐深山產鹿土人計其產子時輒於夜半伺其洞側鹿乳子必五更乳畢出洞至暮方歸每日祇乳小鹿一次小鹿食乳於腹結十二小

餅每一時輒消一餅土人候母鹿出洞卽將乳鹿  
抱歸剖腹出餅持貨遠方爲珍藥價值兼金其餅  
如雲南棋子大色微黃乾者作老黃色腥氣最烈  
食之大能強陰益命門火衰於老羸最宜

理怯弱虛損發痘漿通女子乾血勞

### 鹿脛骨

綱目鹿條有骨乃指全體而言至脛骨不聞有用  
法今時醫有斑龍散純取其脛爲用因載其方以  
補之

生肌收口 救生苦海用斑龍散取鹿脛骨濕紙

包固灰火煨之以黃脆可研爲度若焦黑色者爲  
過性勿用摻大毒生肌甚速

猴經

入藥名申紅深山羣猴聚處極多覓者每於草間  
得之色紫黑成塊夾細草屑云是母猴月水乾血  
也廣西者良

治乾血勞

犬豕胎糞

史長惺有不服藥而黠眼發汗方以初男胎糞煉  
而升之加水麝磁斲收有當發汗者男左女右以



乳點之卧卽汗出本草所未載小識云犬豕初生糞皆可合煉不必定嬰孩也

### 獠油

獠卽獾字所在山澤有之穴居食蟲鼠劉仲旭云北直河堤一帶尤多穴岸而居最爲堤防之患守河兵卒多捕之一說獠入螫時必食蜂始過冬不饑有人於初冬發其螫穴得獠破腹其肚胃中猶有蜂糞腹中皮爲蜂螫輒厚數寸或藉此不饑此說亦未可深信堤民得獠脂多市煤廠作地燈非此不可他油輒爲地風吹滅惟獠由作燈能禦地

風也

入膏中拔濕如神 繆仲淳廣筆記趙府膏藥中  
用之

治頭上白禿 集驗用獾油火烤擦三四次即愈  
如年久者恐不生髮以枸杞子煎湯飲

痔瘡 劉怡軒云一切內外痔獾油塗上立效  
欬血胸中哽噎怵怵如蟲行者 不藥良方猪獾  
油入酒和服或下或吐或自消也

海狗油

海狗出遼東登州海中即膾肭獸也綱目載膾肭

臍不言及其油之用故爲補之。蓬萊李金什言  
其地登州海口出海狗皮可作裘帽俗美其稱曰  
海龍卽此其腎乃藥中膈臍土人取海狗名曰  
打狗此物晝夜潛海底惟孳乳時登島產子稍大  
卽相率入水人不可得須冬月極凍時海崖水口  
結冰天晴海狗羣出處冰上曝日必候其卧冰時  
驟入水以木棍擊其腰方可得之若冰裂或步履  
有聲非其睡時皆不可得然每年打狗墮水溺死  
者亦多因利重人亦不惜軀命以往

性熱而降善消利治三焦濁逆之氣能清水臍積

寒停飲觀近海人取鰻魚海參者用其油滴海面  
海水卽清見底砂石畢見可知其性之分利也  
近有人自關東帶來其油綠色如乾糊以塗皸瘡  
卽愈次年不復發其性熱烈可知

狐麝

金沙江志產東川昭通二府較常麝香氣尤烈佩  
之辟邪絕惡夢定魔

鱨糞

綱目鱨條載其屎泊魚臍瘡及下疳而已不知有  
消瘤之功今補之

王氏檢秘消瘤用獺糞一兩天南星三錢麝香三錢共研末醋調塗上卽愈

### 狼脂

本經逢原云狼性追風逆行故其糞燒烟能逆風而上燒灰水服治骨鯁以其性專逆行而無阻滯也狼脂摩風首推而本草不錄亦一欠事按周禮冬獻狼取其膏聚也內則食狼去腸古人以爲食品綱目獸部狼膏下瀕湖僅據飲膳正要載其能潤燥澤肌塗惡瘡而已不知其大功用乃能驅風散逆結之氣何可昧耶故急補之

入風氣膏中能去積久風痺調酒服散逆結之氣

山羊血油

糞

常中丞筆記山羊生平樂山崖間能陟峻坂躡捷若飛其血可治跌損傷及諸血症凡跌撲死者未絕氣以一分許調酒飲之遂甦神效立見第捕甚難每見人則決驟而去飈迅非常非足力所能及必密布繩網草間罾其足始能生得之刺其心血待乾凝結成塊可以攜遠蓋凡血皆患凝滯山羊踰高歷險旦夕不休則其血活矣而心爲主故心血最良語云流水不污戶樞不蠹觀此益信。本

經逢原云山羊產滇蜀諸山中性善走逐好鬪內  
能療冷勞山嵐瘴痢婦人赤白帶下其心血瀕瀕  
綱目失載苗人取血法以麋竹通節削鋒利活刺  
心血收乾者良宰取者不堪用○柑園小識山羊  
血產廣西諸土郡山羊似羊而大善鬪能上絕壁  
每登高處失足或至骨折少頃如故喜食三七苗  
其血主治損傷極妙輕者服數釐重者二三分以  
心血爲上身血次之色黑有光而質輕者爲眞○  
陸祚蕃粵西偶記試山羊血取雞血半盃投一粒  
過宿變成水或以久凝臭雞血一塊投入山羊血

過宿反變成鮮血乃眞。○瀕湖綱目云山羊卽野  
羊也一名羴羊非今之家山羊也時珍於山羊土  
治條僅載其肉之功用不及油與血之用此並附  
之。○今人收得乾血成塊者必用糯米養之云可  
久留不枯

性温味鹹無毒逢原云爲和傷散血之神藥其治  
跌撲損傷單用酒服取醉醉醒其骨自續每用不  
過分許不可過服雖不耗傷元氣而力能走散陰  
血然必初患便服得效最速若過三五日血凝氣  
滯無濟於治矣價等牛黃心血亦不易得滲血丹



用之眞虛勞失血之續命丹也。藥性考山羊血  
味鹹療跌撲損傷咯吐嘔衄便溺諸血能止血消  
瘀和酒服其皮作茵褥愈筋骨疼痛角作火罐炙  
頭風以入水一絛不散者眞

吐血。蔣莘田經驗方臨卧時用廣西眞山羊血  
每服三分能引血歸源不過二三服其血自止

黎峒丸 治跌打及一切癱腫天竺黃八分牛黃  
四分冰片四錢三七四錢血竭四錢兒茶四錢麝  
香四分沒藥四錢阿魏二錢雄黃二錢藤黃四錢  
孩兒骨一兩山羊血製浸藤黃入藥其爲細末煉

蜜爲丸如龍眼大陰乾外用蠟爲殼封固三白酒服

祝氏效方 山羊血能解鮮菌河魴毒傷損惡血  
治痘內無漿不起發 集驗良方用眞山羊血三  
分用甜酒釀調服痘漿立起

太乙神鍼方 人參四兩三七八兩山羊血二兩  
千年健一觔鑽地風一觔肉桂一觔眞川椒一觔  
乳香一觔沒藥一觔穿山甲半觔小茴香一觔蒼  
朮一觔眞蘄艾四觔甘草二觔麝香四兩防風四  
觔以二共爲細末用綿紙一層高方紙三層紙寬

裁尺二寸五分長一尺二寸將藥末薄薄鋪勻在  
上一針約用藥七八錢錢緊捲如花炮式務要緊實  
兩頭用紙封固外用印花布包面亦要齊整好看  
此針能治一切痛風寒濕筋骨疼痛諸症用時將  
針以火焯著或按穴道或在痛處下襯以方寸新  
紅布數層將針按上若火旺布薄覺疼多墊布數  
層但針必須三四枝一針已冷再換一針連進七  
針無不立驗

治喉癰 喉症惟此最遲久則失音不可救種福  
堂方西牛黃一分真山羊血二分川連五分血珀

三分冰片一分硼砂一錢青果核灰三分燈草灰  
五分共爲細末每一茶匙藥用一茶匙蜜調放舌  
尖上徐徐嚥下一日五次兩月可愈或加蠶蛻梅  
灰更妙

馬氏夾棍神方 吉雲旅抄山左馬家市夾棍藥  
極效方用蚰蛇膽二錢山羊血一錢半琥珀一錢  
大白頸地龍七條去泥珍珠三分辰砂一錢兒茶  
八分金箔一帖爲衣爲細末蜜丸桐子大金箔爲  
衣每服一錢五分好酒下如不打夾者用刀破皮  
藥白出

治急心痛。集驗方用山羊血一分燒酒化下

中遇邪鬼。醫鈴此症乃陽氣衰而陰甚治須急補其陽以存正氣則陰邪自平卽或治痰然亦當如意補正爲本人參二錢當歸六錢白朮一兩菖蒲二錢半夏三錢白芥子三錢丹參五錢皂角刺五分山羊血八分附子一錢此方用山羊血皂角刺爲開關聖品以通邪祟之要路半夏白芥消其寒痰無寒之侵斷不中鬼大用參以扶其陽陽生陰滅此不易之理也

救絕仙丹 石室秘錄此丹專救五絕及有邪祟

昏迷一時卒倒者皆可灌之以起死回生實神奇之極宜端午日修台備用濟急大可救人山羊血三錢菖蒲二錢人參三錢紅花一錢皂刺二錢製半夏三錢蘇葉二錢麝香一錢各爲末蜜丸如龍眼核大酒化下

敏按山羊血以產滇黔及蜀者佳以其地深山多三七苗及理血定風諸草山羊每食之峒人追逐得之山羊本迅躍無一刻之停其體血自頂貫尾終日旋運如飛又被逐捕則躁性頓發血隨氣運矯捷尤甚黎峒人捕得以竹鎗刺入其心取血用

此上品也其血成條深紫有光以少許入水中自然旋運如飛蓋矯捷之性猶存也若網取刀剖而得者血色黯滯入水亦不能迅捷他省產者亦能如峒苗之台衆追逐令其騰躍上下而後刺取其心血用亦可較次於滇黔山羊血惟今之各處所獲山羊皆用網取其或鎗斃而後剖其死血以僞充心血則力微性緩更有以他血代充者則尤屬贗質無用故今市中每多此物高索重價非親歷其地眞知灼見而得者勿用也

### 山羊油

張卿子秘方集驗治主心疝用山羊油不落水者  
荷葉包裹挂風處陰乾不可著雨遇此症取三五  
錢沖熱酒服不飲酒者滾湯亦可并治諸疝

按文堂集驗主心疝用山羊血其言與此同然細  
繹文義有不落水句則用油非血矣文堂誤以油  
爲血故並正之南方亦有山羊但不及粵產者其  
血尤爲迅捷也

### 山羊糞

山羊糞同水粉各一升浸一夜絞汁頓熱午刻服  
治疳痢



祝西葺本草山羊屎煨灰療潰爛生肌

入外料收口藥用 祝氏效方大棗丸用山羊屎

曬乾入鍋炒炭存性研細收藏每久爛不堪將見  
內腑者以大棗去皮核搗爛如泥後入前粉搗至  
成丸每服四錢黑棗湯送下此物大能斂潰爛諸  
口神效無比

山蓮散用大活鯽魚一尾破腹去雜以山羊屎塞  
實魚腹放瓦上慢火炙乾存性研末加麝香一錢  
封貯如遇潰瘍爛見內腑止隔一膜者以此藥摻  
上立愈

雷頭風 祝氏效方云諸藥不愈惟山羊糞炒炭  
研粉甚效歌曰雷霆頭裏震山羊糞有綠酒送二  
錢下不在腦門喧

治心痛不論遠年近日 玉泉方山羊糞七粒油  
頭髮一握同燒爲末好酒和服永不復發

### 石羊膽

廣東通志石羊色黑類人家羊而躡捷其角燒紙  
爲火罐能收頭風其皮作褥可愈筋骨疼痛其血  
能療跌打損傷猶秦中山羊也○肇慶志石羊出  
高要山中似羊而高大長角厚耳此羊一孔三毛

服用柔而能久 內兄朱問亭官粵曾寄石羊膽一對盛以銀匣大如小指以絨線紮其一頭乃乾者據言此物不易得試驗之法以此膽囊掛胸前急行不喘者真治折傷勝於山羊血也

治一切目疾勞眼青盲人乳調點風火防風汁調點此物去翳障如神水調亦可

跌撲功同山羊血

曹閩亭先生曾宦黔中云邊邑皆產石羊形小如兔趨捷難獲有得之者須卽破其腹取膽少遲則裂於腹內矣其膽乾之可療肝厥暴絕酒服一二

釐卽甦其心血能治真心痛頗有效骨皮熬膠去風活血如神

山狸

坤輿圖說利未亞國有山狸似麝臍後有一肉囊香滿輒病就石上剔出始安其香似蘇合油黑色療耳病

犀牛皮

物理小識近有從船上來者此真是海犀其皮入藥

治風活血最效

貂尾

貂出西北塞外食松栗卽南中松狗之類其行捷穿樹枝如飛蓋以尾爲用者故其力在尾綱目貂鼠條止載其皮毛拭目去眯而遺其尾故爲補其功用

凍瘡用貂尾燒存性爲末摻爛處自愈未破者用舊貂皮毛煨研香油和搽養素園驗方

七葛

回疆志出伊犁西番一帶用馬乳裝皮袋內以繩緝口手提袋提壓半時許放於熱處一夜卽成名

之日七葛飲之熱而補人若日日服之有返老還少之功云

性熱補虛羸長力怯弱者宜之

### 香鼠

珍異藥品云出雲南形如鼠僅長寸許周櫟園書影云密縣西山中多香鼠較凡鼠小死則有異香蓋山中之鼠多食香草亦如獐之有香臍也山中人捕至篋笥中經年香氣不散桂海志云至小僅如指摩大穴於柱中行地上疾如激箭

治疝甚驗

鼠血

此乃家鼠血綱目於鼠下獨遺鼠血今補之。木  
經逢原云生鼠血蘸青鹽擦牙宣有效牡者良

猫尿

胞胎尾  
血白松香

取蒜片擦猫牙溺卽下

鳳聯堂驗方治偷糞老鼠用猫尿并底泥和勻圍  
之立愈。急救方塗蝎毒螫傷。蟲入耳中不出  
以猫尿滴之立死

猫胞衣

爲治膈噎之神藥瀕湖綱目猫下雖附胞衣惟引

本草綱目拾遺

卷九

鼠血

猫尿

胞衣

奎

楊氏經驗方治反胃吐食燒灰入硃砂服其他概未之及焉且取之有法食之有忌均爲補之

膈噎 同壽錄用猫初生胞衣以新瓦焙乾研細末每服一二分好酒送下口含竹筆管睡恐咬牙及咳嗽米不下者五六服卽愈取猫胞法猫將產以木枷枷之恐生出卽食也忌燒酒

翻胃 鳳聯堂經驗方猫胞衣三個好酒洗用猪肉四兩淡煮熟服之數年者立效。莫際華云胃腕痛非服猫胞不能斷根

金御乘云猫胞衣凡患小產婦於產後或爲羹或



爲未食嗣後卽不小產極驗

猫胎

祝氏效方治癱痺用猫胎一個泥裹煨存性菜油調搽

猫尾血

不藥良方急驚風剪破猫尾滴血沖滾湯下

白松香

汪連仕云卽瓦上多年猫糞色白火煨用治鹽哮喘厥作痛更理瘟疫鼠瘡立刻見效

浙驢皮膠

黃雲盛言近日浙人所造黑驢皮膠其法一如造阿膠式用臨平寶莊水煎熬而成亦黑色帶綠頂有猪鬃紋與東阿所造無二入藥亦頗有效蓋阿膠真者難得有浙膠則較勝於用雜膠也寶莊在臨平湖西岸有寶莊泉土人名爲大力水云食之多力向聞虎跑泉水注大缶中平口投錢於中能吞一百六十青錢而水不溢他水至又十已浸漫於外矣故虎跑泉食之益氣力寶莊水能吞二百青錢不溢其力更可知以此水作膠自可敵伏流之濟水然予每索此膠於市遍詢藥客皆云造者

亦少不易得而雲盛言之甚詳姑存之以備異日  
考証

補血潤燥功同阿膠治內傷腰痛強力伸筋添精  
固腎尤別有殊能也

### 霞天膏

綱目書部牛下附倒倉法而無霞天膏製法近時  
用之頗多故附錄之本草經疏亦載爲專品其法  
用肥嫩黃牛肉三四十筋洗極淨水煎成糜濾去  
滓再熬成膏用繆仲醕曰胃屬土爲水穀之海無  
物不受胃病則水穀不能以時運化羈留而爲痰

飲壅塞經絡則爲積痰老結痰痰等症陰虛內熱  
生痰則爲偏廢口眼歪斜留滯腸胃則爲宿飲癰  
塊隨氣上湧則爲喘急迷悶流注肌肉則爲結核  
王隱君論人之諸疾悉由於痰然而痰之所生總  
由於脾胃虛不能運化所致惟用霞天膏以治諸  
痰証者蓋牛土畜也黃土色也肉者胃之味也熬  
而爲液雖有形而無濁質也以脾胃所主之物治  
脾胃所生之病故能由腸胃而滲透肌膚毛竅搜  
剔一切留結也陰虛內熱之人往往多痰此則由  
於水涸火熾煎熬津液凝結爲痰膠固難散者亦

須以此和竹瀝貝母橘紅蘇子栝樓根枸骨葉之類消之或以橘皮白茯苓蘇子白荳蔻仁半夏蒼朮爲麩治脾胃積痰或以橘皮貝母蘇子栝樓根及仁蓬砂爲麩治積熱痰結

味甘溫無毒主中風偏廢口眼歪斜痰涎壅塞五臟六腑留痰宿飲癰塊手足皮膚中痰核

穆氏經疏

### 羊哀

形圓如彈大小不等產羊腹在胃中惟山羊有之胡羊不能成也蓋羊食百草其精氣聚於胃久則成此物俗呼百草丹亦牛黃狗寶之類牛黃細膩

而疎鬆且香烈故以黃名狗寶花白而堅凝如石故以寶名此則如爛草團成輕鬆而氣膾人多惜其不能如牛黃狗寶之精美而亦產於羊腹得日月精華又食異草孕結乃不堅重香凝僅成此物故哀之因名曰哀○常中丞宦遊筆記載軍營於羊腹中得石子名鮮答形如鴨卵色紫黃兩頭有二白圈圓如黃豆腰有束帶寬如韭葉色青藍束帶上亦二白圈質細如玉滋潤如水較耕錄亦載蒙古求雨取淨水一盆浸石子數枚持咒播弄其石子名鮮答產畜腹中牛馬皆有不必定羊也而

羊哀又與鮓答異鮓答堅重細潤此則輕鬆羶臊亦無束帶白圈庚戌冬友人李金什在臨安西關外屠羊肆見屠者剖一羊胃中忽湧出一彈如鴨卵黃勻圓光潔浮水盆上購歸示予予曰此羊哀也氣臊而鬆非鮓答之類彼云屠者呼爲百草丹云業此三十年止取得三枚亦不易遇也此物惟山羊始生因山羊食百草偶嚙得異草或石乳其膏液注胃中日久凝成胃爲精氣往來之所日爲氣運動故所結之物多圓如丸鮓答結於腹不爲氣擾動故形匾圓如石金什卽以此贈予予復取

本草綱目卷之九  
細視其質鬆而亦堅嗅之作羊臊氣外則色澤光  
膩儼如油潤其體質非石非酥如腐草融結始信  
說畧所載羊哀如濕茅紙之說爲不謬因附記於  
此以待折衷於格物諸君子按百草鏡羊脰結成  
在羊腹中色微黑可治反胃或卽此歟

解百草藥毒治噎膈翻胃

敏按慈航活人書端五日收羊屎名百草丹可絕  
瘡與羊胃所積草有別不可不知

蘭薰

家鄉肉

陳火腿骨

猪項上螻

俗名火腿出金華者佳金華六屬皆有惟出東陽



浦江者更佳其醃腿有冬腿春腿之分前腿後腿之別冬腿可久留不壞春腿交夏卽變味久則蛆腐難食又冬腿之中獨取後腿以其肉細厚可久藏前腿未免較遜蓋金華一帶人家多以木甑撈米作飯不用鑊煮飯湯醃厚者以飼猪其養猪之法擇潔淨欄房早晚以豆渣糠屑餵養兼煮粥以食之夏則兼飼以瓜皮菜葉冬飼必以熱食調其饑飽察其冷暖故肉細而體香茅船漁戶所養尤佳名船腿其腿較小於他腿味更香美凡金華冬腿三年陳者煮食氣香盈室入口味甘酥開胃異

常爲諸病所宜。東陽縣志薰蹄俗謂火腿其實烟薰非火也醃曬薰收如法者果勝常品以所醃之鹽必台鹽所薰之烟必松烟氣香烈而善入製之及時如法故久而彌旨另一種名風蹄不用鹽漬名曰淡腿浦江爲盛本邑不多。陳遠夫藥鑑浦江淡腿小於鹽腿味頗淡可以點茶名茶腿陳者止血痢開胃如神。陳芝山食物宜忌火腿醃過晾燥高挂至次年夏間者愈陳愈妙出金華府屬邑者佳。常中丞筆記蘭薰金華猪腿也南省在在能製但不及金華者以其皮薄而紅薰淺而

香是以流傳遠近目爲珍品然亦惟出浦江者佳其製割於冬月用鹽勻稱使肉堅實不敗最上者曰淡腿味美香潔可以佐茶各處皆無此製蓋此地畜豕闌圈清潔俟其將茁壯時卽宰剝醃曬或曰其豕種原異他處而又得香溪等水飼之亦近乎理。陳瑤藏藥秘訣凡收火腿須擇冬醃金華豬後腿爲上選皮薄色潤日照之明亮通體隱隱見內骨者佳用香油遍塗之每個以長繩穿腳排勻一字式下以毛竹對破仰承以接油置之透風處雖十年不壞倘交夏入梅上起綠衣亦無害或

生毛蟲見有蛀孔以竹簽挑出用香油灌之如剖  
切剝者須用鹽塗切口肉上荷葉包好懸之依此  
可久留不壞。朱氏僕葛三言少時曾傭金華習  
其業知醃腿法甚詳云火腿金華六屬皆有總以  
出浦江湯家村者爲第一村止一二千戶皆養猪  
作腿其猪不甚大極重者不過七八十觔製爲腿  
乾之不過三四觔或五六觔不等四時皆可醃惟  
冬腿爲第一冬醃者皮細無粟眼手摸之潤膩切  
開無黃臙爪灣可久留不蛀他時者皆易蛀春腿  
多粟眼夏腿爪直秋腿皮粗醃法每腿十觔用炒

鹽四兩以木刻植如人手掌狀糝鹽後用掌植輕  
輕揉擦四圍兼到侯皮軟如綿然後入缸缸面蓋  
以辣蓼竹匾覆之待七日後有酒翻攪一轉令上  
下勻再以炒鹽四兩如前法以手揉醃入缸十日  
後出缸卽用缸中原計洗淨一一以草繩縛足挂  
懸風處惟冬醃者不滴油

味鹹甘性平。陳芝山云和中益腎養胃氣補虛  
勞。陸瑤云生津溢血脈固骨髓壯陽止泄瀉虛  
痢羸勞怔忡開胃安神

藥性考火腿鹹溫開胃寬膈病人宜之下氣療噎

腹痛或三四日不止。○筆苑仙丹火腿肉煎湯入  
眞川椒在內撇去上面浮油乘熱飲湯立愈累驗  
久瀉。○救生苦海陳火腿腳爪一個白水煮一日  
令極爛連湯一頓食盡卽愈多則三服此予宗人  
柏雲屢試屢效之方也百草鏡云火腿出浦江縣  
脛骨細者眞陳者佳皮上綠徽愈重其味愈佳須  
洗去垢及黃油用

嘉香肉

食物宜忌云又名家鄉肉出浦江者最佳。○藥鑑  
云家鄉肉金華屬邑俱有之秋卽醃給客販入省

城市賣其肉皮白肉紅鮮氣香美不似他處醃豬  
肉色少鮮澤也但一入杭城店便加硝滷投缸中  
浸透然後出售蓋不爾則肉味淡反不美而秋時  
尙暖不漬透硝滷又易腐臭也肉爲硝漬食之恐  
乏補益不似火腿冬醃陳久者爲佳然今店中所  
售火腿均以家鄉肉腿風乾至次年皮上起綠衣  
充陳火腿賣人多不察若療病作食餌須眞金華  
腿方有效也

味鹹甘性平。陳芝山云補虛開胃。百草鏡云  
平肝運脾和血生津。藥鑑云滋腎健足力

敏按芝山所言乃未經杭肆滷漬之肉故能補虛  
若經滷漬透便能燥肺凡肺痿陰虛咳嗽者恐非  
所宜產婦虛勞須補者亦忌其肥肉得硝滷入腹  
卽成痰體肥作痰者亦不宜多食倘食之作痰杏  
仁研食可解

附治箭鏃不出方 家寶方用陳年醃肉去皮取  
紅活美好者同其肥細切剉濃將象牙末及人所  
退爪甲爲末共爲研細拌入所剉肉內再爲勻剉  
令其合一厚敷箭鏃周圍約一飯頃其鏃卽自迸  
脫竟有迸至二三尺遠者



陳火腿骨

百草鏡云煨黑研用治食積及痢

治痢 救生苦海用陳火腿骨二根炭火煨灰篩過加上白糖一兩米湯飲或滾水或酒調服無不效。又方治赤白痢陳火腿骨灰陳皮炙草各一兩爲末蜜丸如菉豆大空心服一錢白痢用薑赤痢用白湯送下。神錦方生火腿骨焙燥研極細末無灰酒送下卽止。醫林集秘用陳火腿骨煨灰六兩飯鍋巴煨灰五兩砂仁炒三兩南山查炒五兩共爲末每服三錢久痢人參湯下紅痢紅糖

湯下白痢白糖湯下糞痢炒焦白朮三錢煎湯服  
霍亂吐瀉藿香湯下

噤口痢 筆珠萃火腿骨煨一兩蓮肉二兩木香  
七錢烏梅三錢醋糊爲丸桐子大每服七丸蜒蚘  
湯下

大人小兒積食諸藥不能消者 不藥良方陳年  
火腿骨煨黑色研末三錢用火內一觔煮熟去汁  
上肥油取清湯一碗將末送下

鼠咬 救生苦海陳火腿骨燒灰香油和敷

小兒臙梨瘡 販翁醫要陳火腿骨燒灰如搯加

礬少許麻油調敷不生髮用老薑擦

### 豬項上蜻蜓骨

燒灰塗一切頭頂疽毒凡腦疽鬢發對口等症麻

油調敷立愈

王聖俞  
手集

### 雄豬眼梢肉

能拔殭肉散毒滯劉羽儀經驗方治對口瘡用雄  
豬眼梢肉三錢剝爛如泥加滑石末四錢和勻敷  
患處頂上以膏藥蓋之拔去殭肉放出黃水即愈

### 製火腿法

李化楠醒園錄有醃火腿法每十觔豬腿配鹽十

本草綱目拾遺

卷九

豬項上蜻蜓骨 雄豬眼梢肉 醃火腿法

五

二兩極多加至十四兩將鹽炒過加皮硝末少許  
乘豬鹽兩熱擦之令勻置大桶內用石壓之五日  
一翻候一月將腿取起瞭有風處四五個月可用  
金華做火腿每觔豬腿配炒鹽三兩用手將鹽擦  
完石壓之三日取出又用手極力揉之翻轉再壓  
再揉至肉軟如綿挂風處約小雪後至立春後方  
可挂起不凍。戴義養餘月令有製火腿法十一  
月內圈豬方殺下只取四隻精腿乘熱用鹽每一  
觔肉鹽一兩從皮擦入肉內令如綿軟以石壓竹  
柵上至缸內二十日次第三番五次用稻草灰一

重間一重叠起用焰草烟熏一週時挂在烟處初  
夏以水浸洗仍前挂之按此乃村鄉土醃火腿法  
要不及金華之蘭薰也然較之杭市醃臘店所買  
火腿則又不啻霄壤矣故並載其法。造火腿醬  
法用南火腿煮熟切碎丁如火腿過鹽先用水泡  
淡再煮去皮單取精肉用火將鍋燒得滾熱將香  
油先下滾香次下甜醬白糖甜酒同滾煉好然後  
下火腿丁及松子核桃瓜子等仁速炒翻取起磁  
礮收貯其法每腿一隻用好麵醬一觔香油一觔  
白糖一觔核桃仁四兩去皮打碎花生仁四兩炒

去衣打碎松子仁去衣四兩瓜子仁二兩桂皮五  
分砂仁五分